



20
22

ISLA ONLINE
Noticia Transparente di Gobierno

Diahuebs 3 November 2022

Email: IslaOnline@gobierno.aw Tel: 528-4952



Gabinete Wever-Croes //



ISLA
ONLINE

Noticia di Gobierno



FORUM CU PRENSA RIBA TEMA DI LANDSPAKKET



Recientemente den sala di prensa di Gobierno di Aruba, a tuma luga un forum pa prensa riba e tema di Landspakket na unda a duna prensa oportunidad di haci pregunta na e profesionalnan cu ta encarga e Landspakket. Profesionalnan cu a duna informacion ta Derrick Werleman, Desiree Croes, Omaira Lares, Angeline Thiel, George Croes, Adrienne Fraser, Maria Pita, Arlene Schipper, John Hessen, Herman Fransen. Prome Minister Evelyn Wever-Croes, a duna inicio na e forum splicando mas di con Aruba a yega na e Landspakket.

Manera ta conoci na comienso di e pandemia, riba 13 di November 2020, casi dos aña pasa, Gobierno di Aruba a firma cu Hulanda un “onderlinge regeling” riba e tema di landspakket. Palabracionnan a wordo haci como condicion pa Aruba por haya sosten di likides. Durante e periodo aki Aruba a haya Awg 900 miyon bou di e condicion cu cierto reformanan mester wordo implementa pa asina pais Aruba por sali mas fuerte y resiliente di e crisis aki.

Landspakket ta un paquete di reformanan riba 8 diferente tereno.

TEMA A: Maneho financiero.

TEMA B: Gasto y efectividad di e sector publico.

TEMA C: Impuesto.

TEMA D: Sector financiero.

TEMA E: Reformanan economico.

TEMA F: Cuido.

TEMA G: Enseñansa.

TEMA H: Fortifica nos estado di derecho.

Esaki ta e 8 areanan cu a palabra cu Hulanda y e areanan aki no ta cambia, nan ta keda cada kwartaal mesun cos. Cada kwartaal ta palabra un agenda pasobra cada area tin diferente paso pa tuma pa por yega e meta final. Na final di un kwartaal ta haci un uitvoerings rapportage pa indica unda nos ta para y si ta bayendo bon of no. Esakinan ta wordo indica cu colornan di stoplicht dus berde ta bon, geel of oranje ta drentando e area peligroso y cora tin un problema. Na principio, Aruba no tabata tin nada otro cu berde pero mas y mas e trabounan ta intensiva y e profesionalnan mester haci tur e trabou y ta yegando den un par di area cu mester mas atencion. Na e momento aki den e 8 areanan tin 63 accion ta tumando luga simultaneamente.

Prome Minister a gradici tur e profesionalnan presente cu ta traha riba e landspakket banda di nan trabou diario. Prome Minister Minister a gradici prensa tambe pa e interes y pa acepta e invitacion na e mainta informativo aki. “Di curason hopi danki. Mi ta spera cu prensa haya tur informacion cu ta buscando y necesario pa asina nos tur por keda mas alert. Pa gobierno un prensa critico, tambe riba ehecucion di e landspakket, hiba informacion corecto na nos comunidad, ta yuda mantene tranquilidad den pueblo.



CHARLA INFORMATIVO DIRECTIE OUDERENZAKEN UN EXITO TOTAL

Diaranson 2 november ultimo a tuma luga e di 4 charla informativo di Directie Ouderenzaken, Centraal Bureau Statistiek Aruba (CBS) y Ministerio di Adulto Mayor unda a elabora riba demencia y malesa cronico na Aruba.

Como panelista tabata t'ey presente Sra. Desiree Helder di CBS, Sra. Kimberly Hoo di Trinity Quality Care Services y Sra. Lisette Does di Stichting Cas Marie unda a duna splicacion amplio riba e tema di demencia cu a tuma luga na Centro di Barrio Playa Pabou.

E charla informativonan aki a wordo organisa durante henter luna di adulto mayor pa trece concientisacion y encurasha participacion activo riba diferente temanan relevante pa adulto mayor entre otro e situacion financiero di adulto mayor, adulto mayor femenino y necesidad di cuidu.

Durante charlanan a duna esnan presente e oportunidad pa hasi pregunta, comparti nan preocupacionnan y conta di nan experiencia como adulto mayor. Pa esnan cu no a logra di atende e charlanan, por wak e videonan cu ta disponibel riba e pagina di Facebook di Directie Ouderenzaken.

Minister di Asuntonan di Adulto Mayor, Sr. Ursell Arends ta sumamente contento cu e interes y participacion di nos adultonan mayor durante e charlanan unda a trece puntonan valido cu ta aporta na e maneho pa nos adultonan mayor.

Minister Arends ta manda palabra di gradicimento na tur panelistanan como tambe moderador Edward Erasmus pa haci e charlanan aki un exito y brinda informacion valioso pa nos adultonan mayor. Alabes un palabra di danki na tur centronan di bario, fundacionnan y gruponan di bario cu a colabora y habri porta pa actividadnan durante luna di adulto mayor.





MINISTERIO DI TURISMO Y SALUD PUBLICO TA ELABORA Ariba E PROYECTO "CHASING HEALTH PODCAST". UN COLABORACION ENTRE MINISTERIO, HAVA Y DEPARTAMENTO DI SALUD PUBLICO



E tecnologia y trend di Podcasting ta uno sumamente popular na diferente pais. Den comunidad mericano por ehempel 75% di adulto ta hasi uzo di esaki, es mas cada 5 di 10 ta scucha podcast cu frecuencia. Un podcast por wordo scucha na diferente plataforma manera Facebook, YouTube y Spotify, Apple Podcast y Google Podcast. Podcast ta un fuente di informacion cu ta wordo poni riba internet. E podcast por wordo baha (download) sea riba un computer of cualkier otro aparato. Esaki ta wordo ofrece den un documento como audio y/of audio visual. E ventaha di un podcast ta cu cada persona ta dicidi ki ora ta e momento mas ideal, ki ora nan ta bay scucha e podcast of ta scuche di nobo. Cada Podcast tin nan mesun tema y largura pa asina comparti informacion den manera innovativo, creativo y cu posibilidad di comparti facilmente ful rond mundo.

Na luna di februari ultimo a tuma lugar e lansamento di e prome podcast di audio visual di "Chasing Health". E podcast ta brinda un variedad amplio di diferente topiconan di cuido y salud. E meta di "Chasing Health" ta pa contribui, dunando informacion y educacion na henter nos sociedad. Door di esaki nos sociedad ta mas mihor prepara den e lucha pa hiba un

bida mas saludabel, cu ta un proceso continuo.

"Chasing Health" ta un iniciativa cu e meta pa keda informa y duna sosten na e comunidad di Aruba pa nan tin e oportunidad di tin un miho salud posibel.

"Chasing Health" a wordo crea pa yuda canalisa informacion tocante salud a base di un tema actual of uno cu no ta facil pa papia over di dje. Bou guia di host Dahariana Evertsz como seccion di Promocion di Salud na Departamento di Salud Publico, cada invitadonan den e podcast ta expertonan cu ta traha den e mundo di cuido y salud pa sinta na mesa pa comparti informacion, educa y guia abo como pashent of cliente di servicionan di cuido pa por tuma e miho desicion pa sigui busca bo salud.

Nos ta invita ful pueblo di Aruba como oyente pa sintonisa na e podcast "Chasing Health" cu ta tuma lugar tur diahuebs pa 8pm di anochi.

Link: <https://youtu.be/D77bsRNJMJY>

"Chasing Health" ta disponible ariba:

- Sopi Mix Studio's YouTube (Sopi Mix Studio)
- Sopi Mix Studio's Podcast Apple
- Sopi Mix Studio's Spotify
- Chasing Health Facebook (Chasing Health Aruba)
- Chasing Health Instagram (chasinghealtharuba)
- HAVA Facebook (HAVA Aruba)
- HAVA Website (www.havaruba.org)
- HAVA YouTube (HAVA Aruba)

Tur siman lo tin un episodio nobo.



KIDSPRENEUR\$ WITH BIG IDEAS CONOCE GRADUADONAN NOBO



Diaranson atardi minister di asuntonan economico, mr. Geoffrey Wever a haci entrega di certificado pa tur e "Kidspreneur\$ with BIG Ideas" di Tra'i Merdia Emma School Ayo.

"Kidspreneur\$" ta un proyecto di Directie Economische Zaken su departamento di IDEA, caminda ta siña hobennan ja for di un edad jong con pa desaroya un plan for di un idea, y un business for di un plan. Asina ta instala conocimiento y bon practica ja for di un edad hoben pa nos futuro generacion.

"Mi a keda sumamente contento pa mira e entusiasmo di e muchanan, especialmente ora a puntra pa nan comparti nan idea pa negoshi. Entusiasmo ta loke ta motiva educacion, educacion ta motiva desaroyo", minister Wever a comenta.

Un palabra di gradicimento na DEACI, IDEA, y na tur esnan cu a contribui pa logra haci Kidspreneur\$ un realidad un bes mas!





MINISTERIO DI DEPORTE TA CLA PA TRATAMENTO DI PRESUPUESTO 2023

Recientemente Minister Endy Croes a reuni cu Ministerio di Deporte den preparacion pa Presupuesto 2023 cu ta wordo trata siman entrante den Parlamento di Aruba. Mandatario di Deporte a enfatisa cu e tabata un reunion fructifero unda a dialoga di e.o. maneho concreto pa pa traha den colaboracion cu Fundacion Lotto pa Deporte, Stichting Sportsubsidie Aruba y Fundacion Facilidatnan Deportivo tanto pa sirbi e atleta y infraestructura di deporte.

Como tambe a trata e plannan pa proyectonan nobo, Weganan Escolar 2023 y Premio Excelencia den Deporte 2023. Den e vision di Gabinete Wever – Croes II deporte y nos deportistanan ta central.



MINISTER ENDY CROES A FIRMA MOU CU ARUBAANSE BOND VAN MOTORSPORTS Y ARUBA DRAG RACING ASSOCIATION

Diaranson atardi Minister Endy Croes a reuni cu Arubaanse Bond van Motorsports (ADRA) y Aruba Drag Racing Association (ABM) unda a firma un MOU. Mandatario di Deporte a expresa despues di basta inkietud cu nos a scucha di diferente partidonan rond den e mundo di drag race como Minister nos a intermedia pa pidi cooperacion. E partidonan a bay di acuerdo pa forma un comision unda cu ABM ta nombra dos miembro como tambe ADRA ta nombra dos miembro cu ta representa tur e coredonan.

Gobierno di Aruba pone dos miembro di cual un ta hurista cu ta e trekker di e comision aki. Hunto di awo pa januari e comision ta encarga cu e tarea fiho via e caminda legal pa haci tur e coredonan miembro oficial di ABM. Asina prepara tambe pa por yega na eleccion premira pa luna di januari / februari 2023 unda tur miembro por participa. Cu e meta pa trece estabilidad y tranquilidad pa tur e coredonan. Gobierno a inverti den luz LED ultra moderno pa Palo Marga, un inversion grandi y asina brinda un bon iluminacion na Palo Marga. Minister Endy Croes



ta contento cu tur partido a bay di acuerdo pa loke ta trata e condicionnan y ohala cu nos por crusa e brug aki hunto y asina trece tur tankilidad pa e futuro di Palo Marga y sigur pe coredonan. Exitó!

Gobierno di Aruba:**HULPBESTUURSKANTOOR SAN NICOLAS UBICA TEMPORALMENTE NA MFA SAVANETA**

Desde 31 di oktober 2022, Hulpbestuurskantoor San Nicolas, cu ta ubica den e edificio di SOGA na San Nicolas, a muda pa Hulpbestuurskantoor Savaneta den MFA Savaneta.

E desicion aki a ser tuma pa motibo cu e edificio di Hulpbestuurskantoor San Nicolas ta den hopi mal estado y ta forma un peliger pa esnan cu ta traha eyan y esnan cu ta bishita e luga. Plannan pa restaura e edificio ta den finalisacion pendiente pa busca un autorisacion di Parlamento.

E mudansa aki lo ta temporalmente pa 6 pa 8 siman mientras ta preparando un otro oficina na San Nicolas mes pa asina Hulpbestuurskantoor San Nicolas sigui brinda ciudadanonan di San Nicolas miho servicio. Como cu ta trata servicio specialisa y ta trata placa, no por ubica e oficina na tur caminda. E trabounan a cuminsa caba.

Durante e temporada aki, nos ta spera cu usarionan di Hulpbestuurskantoor San Nicolas tin comprension pa e situacion. Gobierno di Aruba no por a laga trahadonan y usarionan den e riesgonan peligroso.

Conferencia di Prensa

Diahuebs | 3 | di november 2022
3:00 PM

Topico:

YECADA DI SINTERKLAAS 2022

**Minister di Cultura
conhuntamente cu
CCDN, UNOCA, SETAR y
ARUBABANK.**







3 nov. 2022

ARUBA A PERDE UN LEGENDARIO



Sosega na paz
Ruben "Scorpio" Garcia

DANKI pa anima, deleita, y trece alegria semper
pa e isla cu tanto bo a stima y ta stima bo.

DESPUES DI TEMPESTAD,
LAMA TA BIRA CALMO ATROBE.
ESAKI TA OPORTUNIDAD PA NABEGA Y RECUPERA.
CU BISTA RIBA E HORIZONTE INSIGUR,
PERO CONSCIENTE CU NOS LO SURPASA ATROBE,
TUR RETO NOS DILANTI COMO UN SOCIEDAD UNI.
MANTENE CALMO Y UZA TUR MAL TEMPO
COMO UN OPORTUNIDAD PA SIÑA Y INNOVA
Y CONBIRTI E CRISIS CU NOS A PASA ADEN,
DEN SPERANSA Y POSIBILIDAD NOBO PA NOS TUR.

Feliz diahuebs!



**20
22** | AÑA DI
INVERSION Y
OPORTUNIDAD